

Petro Aliyeongoka, Mchungaji Msaidizi

Lakini nimekuombea wewe ili imani yako isitindike; nawe utakapoongoka waimarishe ndugu zako.—Luka 22:32.

Petro alikuwa amemkana wazi Bwana wake mara tatu, na mara tatu Yesu alimsonga na lile swali lilichoma moyo wake uliojeruhiwa kama mshale. Mbele ya kusanyiko la wanafunzi Yesu alifunua kina cha toba ya Petro na kuonesha jinsi ambavyo yule mwanafunzi jeuri na mwenye kujitapa alivyokuwa amejishusha.

Kwa asili Petro alikuwa mtu wa kujitanguliza na mwenye mihemko, na Shetani alitumia fursa ya tabia hizi ili kumwangusha. Muda kitambo kabla ya kuanguka kwa Petro, Yesu alikuwa amemwambia, “Shetani amewataka ninyi apate kuwapepeta kama vile ngano lakini nimekuombea wewe ili imani yako isitindike; nawe utakapoongoka waimarishe ndugu zako” (Luka 22:32). Wakati ulikuwa sasa umefika, badiliko ndani ya Petro lilikuwa dhahiri. Maswali ya kuuchunguza moyo ya Bwana hayakuwa yametaka majibu ya haraka na kujitosheleza nafsi; na kwa sababu ya kunyenyekea na toba, Petro alijiandaa vizuri zaidi kuliko hapo awali kufanya kazi kama mchungaji wa kundi....

Namna ya Mwokozi ya kumshughulikia Petro ilikuwa na funzo kwake na kwa ndugu zake. Iliwafunza wanafunzi kumkabili mkosaji kwa uvumilivu, huruma, na upendo unaosamehe. Ingawa Petro alimkana Bwana wake, upendo ambao Yesu alikuwa nao haukuyumba. Ni upendo huo ndio mchungaji anapaswa kuuhisi kwa ajili ya kondoo na wana kondoo aliopewa kuwaangalia. Akikumbuka udhaifu wake mwenyewe, Petro angeshughulikia kundi lake kwa upole jinsi Kristo alivyomshughulikia yeye....

Yesu alitembea peke Yake pamoja na Petro, maana kulikuwa na kitu ambacho alitamani kumwelezea yeye peke yake. Kabla ya kufa Kwake, Yesu alimwambia Petro, “Niendako mimi huwezi kunifuata sasa, lakini utanifuata baadaye.” Kuhusu jambo hili alikuwa amejibu swali la Petro, “Bwana, kwa nini mimi nisiweze kukufuata sasa? Mimi nitaotoa uhai wangu kwa ajili yako” (Yohana 13:36, 37).... Jaribu lilipokuja Petro alishindwa lakini alikuwa apate nafasi nyingine ili athibitishe upendo wake kwa Kristo.... Na hivyo Yesu alimfunulia Petro kifo hasa ambacho angekufa; hata alitabiri kunyosha mikono kwa Petro juu ya msalaba.... Alijisikia kuwa radhi kupata mateso ya kifo chochote kile kwa ajili ya Bwana wake (Tumaini la Vizazi Vyote seh. ya 2, uk. 423–425).